

四庫全書

集部

欽定四庫全書

騎省集卷十一

宋 徐鉉 撰

舒州周將軍廟碑銘

將軍諱瑜字公瑾廬江舒人也吳史列傳功炳乎丹青
皖城遺祠頌闕乎金石嗚呼皇天有造物之柄有愛民
之仁必待聖人而後行王者有承天之德有濟世之量
必待聖人而後發故天人合應聖賢相須民之司命闕

一不可也雖復凌雲之臺非一木之材千金之裘非一狐之腋然其建大號運長策總覽英傑弘濟艱難亦一二人而已故革夏者九有之師而伊尹為阿衡翦商者三千同德而呂尚為尚父秦為無道高祖誅之則鄼侯蓋於羣后莽據閏位光武正之則仲華冠于四七漢宗失御孫氏奮發破虜討逆繼志勤王而將軍傾蓋於千載之顯濡足於百六之會策名江左宣力中朝殊勲盛烈曠代齊契何其偉哉於是王業始基羣兇方熾國難

荐及人心屢搖將軍情發於中義形於色履艱危之際
貞節彌堅率振蕩之衆伸威方厲推誠以明大義故逆
折游說之鋒屈身以表至公故首定君臣之敬摧赤壁
之陣勢動九州建漢中之謀量包四海於是強敵攝跡
羣生延頸姦雄之智無所施為漢室之隆未可量也嗚
呼天未悔禍國之不幸修塗止於偏帥大命殞於巴丘
流慟於當時遺恨於終古豈四百之運厯數難移三分
之基疆宇有限不然何雄才大畧神授之如彼短命促

齡天奪之若此忽乎茫昧不可得而詳也夫英聲由於
茂實元功出於全德威稜所及非勉強之攸能績用斯
存豈毀譽之可奪有異為新造之國柴桑乃觀望之師
大帝非爭衡之才子布有私室之顧將軍投袂而起橫
戈以出魏蜀二主天下英雄或垂翅而宵奔或俛首而
求投降茲以往烏足道哉至於分財推宅之仁觀樂雷
音之妙知人先覺之哲存交服物之懷實天縱其能亦
行有餘力矣嗟夫民墜塗炭真主所以臞瘠天造草昧

良佐所以驅馳非君臣同體不足以濟大業非帷幄共
斷不足以制衆流將軍能沮蔣生之譚而吳主亦能拒
敵國之間將軍能畫不世之策而吳主亦能破羣疑之
心故得不顯霸功如斯之盛當此時也如趙士之碌碌
漢相之齷齪徒使有若林之會安能施一繩之維又況
於市道之交署門之客哉此義夫節士所以感激於風
雲惆悵於時運者也嗚呼微管之績既息於中區盛德
之祀遂崇於東夏歷世逾遠善慶彌彰翼子詒孫徒封

移社而支庶繁衍故在舒庸召樹猶存魯堂無壞光靈
不泯實生太尉中書令西平恭烈王焉半千之運懸符
祖德萬夫之望允濟時屯始爲定亂之雄終爲佐命之
老而仁風所被多在故鄉王與嗣子鄴皆節制廬江今
仲子祚復刺舉濡部過里門而載軾瞻廟貌而長懷命
梓人以新其堂典督里宰以除其徑術教祝史以絮其
邊且率宗屬以薦其孝思肇建豐碑以永前烈懿哉象
賢之美共理之勤民用接和歲則大有庾夫不佞敢作

頌云

皇天上帝敷祐下民既命賢主亦生賢臣有若將軍救
時之屯仗義秉信資忠輔仁堂堂定策寥寥忘身雄飛
夏口橫薦江陵將軍猶生漢室不傾將軍既沒天下三
分盛德之享嚴祠未湮壯夫擊節義士沾巾猗歟舊國
赫矣雲孫嗣勲纂服長戟高門壽公有煥雲貌如存我
紆蘭佩來挹犧罇懷賢慷慨用獻斯文

大唐故匡時啟運功臣清淮軍節度壽州觀察處

置等使特進檢校太傅持節都督壽州諸軍事
壽州刺史御史大夫上柱國彭城威侯贈太尉

劉公神道碑

聞夫郊圻內理牧萬民者是曰諸侯夷狄外壤守四方
者其惟猛士然則安危異任文武殊塗故天下方爭韓
彭英吳橫雕戈而震耀羣生待理龔黃冠賈擁皂蓋以
從容及夫昭格寰區紛綸簡冊其歸一也代有人焉若
乃總是全謀覃於奕葉流光受社潛齊累將之家崇德

計功下視世卿之族古難具美我則兼之公諱崇俊字
德修其先彭城人高祖升調補山陽淮陰尉遂家焉即
為縣人也岳峻洪基海䟽遙派陽城相土千齡侯伯之
封沛澤中興兩代帝王之膺懷黃結紫論鼎甲以盱衡
刻像圖形誓山河而捧袂國史家牒披卷可知頃者聖
運中微羣方暫擾驪山之北犬戎興戲水之師踐土之
庭天子屈河陽之召公路擁南陽之衆僭號仲家隗囂
據隴右之圖坐論西伯勤王問罪吳太祖始定揚州賜

朕專征昭皇帝遂加殊禮於是揚旌北討遷寇迹於淮
濱闢土西封謀守臣於諸將命我顯祖作牧鍾離乃固
堡障之嚴載施犬馬之備軍無耗政將期十萬之行師
有見糧即聚九年之蓄方圖大舉已仗前受永年不登
未幾而歿長山羣盜舊畏來公西域故營願從班勇復
命烈考嗣膺使符不還渭水之兵誓卒龍門之託故蓼
城之戰斬獲過當汝陰之圍策勲居最先零委質關充
國以無由獫狁驚蒐射郅都而不中疇庸錫羨建清淮

軍以壯中權加禮慎終贈太尉公以光幽窆既而鼓輦
悽愴部曲徘徊家有遺恩人思世德帝曰崇俊惟爾恭
儉孝友誠明惠和任則中軍帥位則文昌長誕舉攸職
予惟汝嘉濠梁之郊控扼遐裔惟乃祖金克懋厥始乃
考仁規克慎厥中肆予命爾克成厥終往哉汝諧無廢
朕命公銜卹奉詔墨經即戎鋪陳政經討閔軍實思有
以光大前緒播揚國風初二先公之理也屬洛邑再遷
浚郊作梗偽新竊據延伉十五之期黃武開元始創三

分之業犬牙之地蠆尾常搖鋒鏑縱橫車徒奔走摧身
獸困尚遙匡復之謨頰尾魚勞未暇綏懷之術逮公之
理也寇皆遠遁民佇息肩千里風從四方聳聽以為格
物必在於立制也故藝貢賦以息貪暴之端暢刑章以
拯姦宄之極賞不虛授罰其必行以為富邦必在於務
本也故使民以時相地之利持未熟之稻游惰自遷班
再易之田兼并絕倖以為邊寧不可以忘武備也故遠
斥候浚溝隍竹與木而靡遺膏與苦而畢給亭障屹峙

軍聲隱動以為強兵必在於實皇畿也故招懷邊毗講習戎事游兵冀馬俱為無犯之容晉傑齊雄並集選和之下歲揀精銳歸之京師其餘庶政常經門見戶睹斯可畧而言也高皇帝禮均元老寵冠列藩受禪之初則進上公之秩肆類之際則委廉使之權言必見從無再却之奏君常高枕忘北顧之憂皇上欽奉重熙聿遵無改毗倚尤重親敬如初先太尉公之薨也西北小驚戒嚴從便因詔執事移清淮軍於壽春及是復立定遠軍

即命公為節度使仍以公少子匡符尚永嘉公主留侯
操印初躋上將之壇帝子吹簫即降王姬之館禮優伯
舅望重懿親於時公莅濠梁十有七年矣米鹽皆序丞
史當才閉閣罕爭舉烽無警朝廷以公能光前烈雅得
邊情清淮之師遺風仍在俾盛一家之美載嚴萬里之
城改壽州刺史充清淮軍節度使鄧侯倏去鷄鳴傷父
老之心長者負來虎渡息鄉閭之患能事畢舉考功再
期方將建大旆以風驅指函關而電掃雲中雞犬八公

之迹徒存夢裏膏肓二豎之妖遂作春秋四十保大年夏六月十有六日薨於壽春公署皇上剪鬚靡反穿壁方遙投綠沈之瓜悲哀竟日賜黃銀之蒂慷慨露襟廢朝三日中使護葬詔兵部侍郎李貽業持節冊贈太尉賜諡曰威即以其年秋九月十五日備鹵簿鼓吹葬於濠州鍾離縣大化里之原禮也前夫人李氏後夫人隴西郡君李氏皆太師趙忠懿王女也賴鄉仙李即開柱史之源參野飛龍遂紀宗卿之籍勲庸六鎮時高謝

氏之門師範兩朝室有班姬之訓荃蘼蘭蕙映戚里以
芳芳藻荇蘋蘩播婦儀而昭晰門內之理夫人有馬子
八人二子幼長子節早亡次範滁州刺史次簡次策次
霸時未仕次符祕書郎或得公之政事或得公之兵鈴
學禮學詩惟忠惟孝皆推酥酪之味咸有芝蘭之芳所
謂積善餘慶世濟其美者也惟公山河龍鳳凝粹彩於
神姿緯候風雲集淵謀於靈府議公家之事不以身為
行將軍之令每由剛克卒祖禰之成業可謂聿修厥牧

伯之寵章訖無虛授所以始終匪玷福祿攸歸同族之間朱輪結軌季父仁贍作鎮夏口弟崇怙崇僖更典晉陵其餘將軍列侯中郎校尉銀黃照爛光浮道德之門珩珮陸離響雜高陽之里苟非自天攸相與國無疆其孰能與於此乎向使享大年敷遠畧鴻飛鵬舉功未可量也天命不然能無永悼昔者荊州從事猶牽墮淚之悲太宰舊寮亦有懷鉛之請況乎世功丕顯揭日月以高驤帝念惟隆會雲龍而下濟欲垂萬葉可不務乎微

臣職典絲綸詞非清潤持赤管以承詔拂貞珉以投刃
庶使蚩蚩眊隸觀迹而長懷眇眇來雲披文而盡信其
銘曰

惟彼陶唐有此冀方自天祐之後嗣其昌侯遷魯縣帝
隱芒碭猗那大族嵩華配長泂泂彭城興我遐祚顯顯
山陽著我高祖高祖伊何仁而不遇慶鍾令孫聿來用
武皇運中否諸侯起爭浚郊怙亂淮壖不庭吳王奮發
受鉞專征命我顯祖守濠之城濠城巖峻濠兵驍勇顯

祖帥之羣兒振恐將軍下世邊烽亦聳乃命象賢荷時
之寵荷寵伊何載大其功蠢蠢梁寇言言潁壻是馘是
俘兵無頓鋒爰有奇畧集於威公威公嗣侯不墜其訓
戎事之隙民功是振為之中典著之令聞泗上風移高
師河潤帝曰伯舅子嘉乃勲扞境則武安邦則文乃降
王姬于爾慶門乃改乘輅於彼西軍西軍何在鎮彼衡
霍威公來思式遏寇虐胡為已遠將星俄落百身寧贖
九原誰作明明天子惻愴聞輦歲云秋止迄旆遲遲二

藩士女泣涕漣洏賢侯逝矣吾誰與歸黯黯塗山湯湯
淮溪駟馬悲鳴滕公所閉甘棠勿翦召伯攸憩是用刊
碑永告來裔

唐故德勝軍節度使檢校太保同中書門下平章
事扶風馬匡公神道碑銘

夫道被萬物處其中者是曰賢人功濟橫流讓其先者
方稱君子施之則開物成務興廣業而同歸卷之則保
族宜家垂令名於必大是以長沙吳芮繁祉邁於三雄

南陽賈復賁寵隆於四七歷代已降靡不由之迄於我
朝則扶風公其人矣公諱仁裕字德寬其先扶風人子
孫或從官於徐方今為彭城人也粵若萬邦作乂益有
佐禹之功因封受氏奢有却秦之績公侯必復關西靡
孟起之威文武未墜南郡被季長之德存乎譜牒無侯
闡揚曾祖某祖某皆以鹵莽之氣當屯蒙之運不履王
侯之事歸全父母之邦考某少負雄名為武寧軍裨將
才高位下厥用弗昭累贈尚書右僕射傳曰有明德而

不顯當代後必有興者故其餘慶集於我公惟公克稟粹靈夙彰奇應方娠而神貺協夢既生而異氣充庭宗族相驚間里交慶識者謂之曰不意英物復鍾此兒天將啟之馬氏為不朽矣長而爽邁輔以博聞善無常師器以虛受乃皇圖中否赤縣淪災戰國縱橫爭求策士孔門堂奧半作家臣公負先見之明審擇君之義舉旗沛澤即授中涓定難京城仍叅主簿而上方從歷試允懋臣功經綸草昧諮訪遺闕公親侍左右日奉謨猷能

知四國之為且掌賓客之禮勞無伐善夙夜不離於公
美則歸君論議莫窺其際出入二紀懋肩一心車服以
庸寵祿來假乃升朝序乃掌禁師以佐領軍將兼總丞
相之兵衛申令惟一任衆惟睦推以恩信先之勤勞周
廬既嚴軍士以簡考績稱宸帝用嘉之遷檢校司徒遙
兼宿州刺史夫千騎之長可以圖功百城之權可以觀
政中外迭處抑惟舊章即授楚州刺史本州團練使旬
服之際邦賦是繁長淮之衝戎寄為急公奉揚王略遵

舉詔條人不易方計日而治徵為右衛大將軍復領舊
兵以衛相府董齊之畧有踰於初明年改右金吾大將
軍以扶風縣三百戶為封邑執金之職歷代雄重綿祀
虛位公首居之內訓却非之士外察苛留之禁熊羆宣
力輦轂無塵及上允膺內禪光啟建業寺府軍衛半存
舊京委公留臺右師俾率東夏即遷檢校太保改右天
威副統軍進爵為伯陝服從入公有力焉及參告類之
儀益光求舊之舉寵開幕府遙領徐方進封侯郡定食

千戶左輔之地王業所基藩屏京師惟公攸賴乃移使
節往鎮京口公慈惠著於郡國威德洽於士心由是齊
人向風期年報政加同中書門下平章事廬州節度觀
察等使自南北分隔輜軒交馳合淝之郊常制衝要故
有台階之命以增外閫之威公於是謹斥堠審號令習
組練之士則聲如颶馳嚴堡障之備則勢若山立遠不
敢犯邊是以寧而察俗之方如南徐之理方當矢謨惟
宸薄伐關河渡江之誓既陳沂渭之舟已具嗚呼良圖

未展早命不融春秋六十有三昇元六年閏三月五日
薨於廬州公署上省奏震悼廢朝三日即用玄甲之數
式擬鐵山之功給於官司臨以中使奉常以視履考祥
之義循貞心大度之美詳協公論易名曰匡即以其年
四月七日備鹵簿儀衛葬於廬州合肥縣鄉里禮也公
娶同郡萊氏封彭城郡君麗穠李之華親采蘋之職理
內協鵲巢之詠從貴有魚軒之華某年月日先公而逝
嗣子右弓箭庫使光庭東頭供奉官光祚閤門承旨光

紹皆稟義方無忝遺烈家承膏梁之後而恭順克修職
叅紈綺之間而雅素自若君子謂扶風公其有後乎夫碑
頌之設有自來矣琬琰之細既垂於茗華盤盂之微又
參於警戒若乃道合天眷忠存王家累輔翼之功而鐘
鼎之報罔間享將相之賞而帶礪之誓弗渝時無間言
沒有餘位故其宗廟之紀金石之盟昭示來茲不可誣
也小臣不學奉旨刊文庶使計功稱德代遠而愈信披
文相質事久而彌芬峴首之懷靡盡昆吾之烈長存鳴

呼哀哉其銘曰


蓋作朕虞實曰元凱崇基締業明德攸在維趙於蕃封
移族改祚實刊山源長巨海因枝別代覓渭來遷道德
絳帳勤王跼鳶流光襲祉映後昭前懷黃結紫著簡成
編誕發材英肇惟明懿鼎角膺奇龜文履異博容汎愛
入孝出悌運有屯蒙器無凝滯爰初發迹雲從潛泉濯
纓職幟拊翼中涓良驥處服忘歸在絃樞機言行無競
維賢繾綣從君匪伊履屐勤毖前受周旋陞戟居國必

聞在身無擇帝爰允諧昨乃丕績惟彼淮泗疆以獫夷
維此京浙續以邦畿封淮表浙惟惠惟威椒蘭在俗轅
轍興思羣舒待理檢狃孔棘帝謂侯氏續服新息式固
爾猷惠此廬國乃陟台階俾藩于北龍旆四牡鉤膺鏤
錫命服有煒光聲載陽疆吏固圉蚩毗嚮方上儀象物
下謚飛禮梁木或顛通川有逝長城既嚴哲人永瘁像
著雲臺風存遐裔輟春盡思瞻山隕淚信結殊俗悲深
上吳丹碑既刻列鼎盡勲祁連不泯庸器長存丕顯百

欽定四庫全書

代惟子有臣

卷十一



騎省集卷十一

欽定四庫全書

集部

騎省集卷十二至
四

詳校官司業

臣納麟寶

檢討

臣

何思鈞覆勘

總校官進士

臣

朱鈐

校對官學正

臣

周銳

謄錄監生

臣

王成璧

欽定四庫全書

騎省集卷十二

宋 徐鉉 撰

荅山紫陽觀碑銘

臣聞太初之氣其生也無始衆妙之門其本也無名積
而成形散而為器乾坤運之而兩儀位王侯受之而天
下貞是故斷鼉鍊石之技絕地通天之業衣裳軒冕之
后干戈揖讓之君雖復遭罹異途步驟一致莫不契協

於神明之域飲和於道德之原廣無為之為執無象之象萬物恃生而不有百姓日用而不知其迹也則格天光表先人而成俗其本也則收視返聽全真而養身至其玉檢登封羅圖啟後游神象外脫屣區中鑄金鼎而乘白雲登寒門而立玄極闕宮清廟式嚴觀德之場玉洞金壇別啓下都之所由是靈符總集真籙岐分三元八會之文潛通髣髴七映九華之室密擬形容足以徵福應乎含生致孝思於時事聖人繼作雲龍相望故

茆山紫陽觀者今上敬為烈祖孝高帝元敬皇后之所
重修也爾乃星紀儲精先為峻極河圖著錄懸示禎期
自道氣融明真精流衍治化宏開於赤縣符圖廣祕於
名山而華陽洞天實羣仙之都會金陵地脉又三茅之
福鄉左憑柳汧烟霞韜映右帶陽谷川源隱鱗伏龍靡
迪鎮以雷平之嶺鬱岡迴合浸以護軍之潭郭真人叩
舷之池不遷留岸許長史煉丹之井自冽寒泉白露紫
烟照映其上飈輪鶴馭往來其間高真七人四處茲地

其後貞白先生以玄德應世肇開朱陽之館以玉書演
祕爰立昭真之臺堂靖䟽基玄洲之蹤可擬生徒廣業
白龜之跡斯存金紱鳳羅代相傳授龍車虎駕世有飛
升及玄靖先生以冲氣含和體庚桑之歲計玄宗皇帝
以尊師重道屈軒后之淳風由是天眷遐臨皇心密契
惟新舊館再易華題丹鼎洞經潔修無倦芝泥龍簡投
奉相望戶邑之民豈止奉明之縣樵蘇之禁寧惟柳下
之墳故得雲物告祥芝英表瑞小周王之瑤水徒詠空

臺異漢帝之猗蘭唯陳甲帳自茲殿後代有修崇上士
名人時時解脫雲輶羽蓋往往降靈皆著於金石播於
謠頌嗟乎四時代謝天道盈虛雖九氣長存歷劫以資
其融結而三階有象隨時因表其晦明則斯觀也將世
運以汙隆與皇圖而升降赤明未啟猶多閭戶之悲白
水方興始漸高門之慶孝皇帝猶龍孕德指樹垂陰應
樞電之殊祥有中天之奇表井盤就學和光於百六之
初庖正分官利見於九三之際賓門納揆有大造於當

時敵矢彤弓允至公於四海由是法堯受命祀夏中興
補西北之不周應東南之王氣御明堂而揖羣后輯瑞
玉而覲諸侯既治定而功成更憂深而慮遠乘奔馭朽
不以黃屋為尊旰食宵衣惟以蒼生為念知無為之無
敗體上德之不德凝神姑射端拱穆清政舉其中事至
而應愛民重法敦本訓農偃革消兵守好戰必危之誠
卑宮菲食懼以人從欲之譏故得百寶効靈三辰薦祉
遠無不屆邇無不安少康光武之功獨高帝錄貞觀開

元之業更啟孫謀今上承積德之基法自然之道變化
無方之謂聖神武不殺之謂仁學洞精微守謙光而冲
穆用昭隱伏體大度以包荒動則庇民不務功而尚智
靜惟修政恒務穡而勸分聞善若驚每賞秋毫之細容
光必照寧遺行葦之微化洽風隨時和俗厚常以天下
者烈祖之天下憲章者昇元之憲章垂裕無窮永懷罔
極衣冠原廟未足盡思聲樂娛神良非至敬緬慕在天
之駕因嚴訪道之宮尋屬長樂上仙躍龍興感載詠生

民之頌思弘十亂之宮乃眷靈巖誕敷明詔發虞衡之
吏集班爾之功執藝駿奔飭材膚至果園之柰供其磬
斲北邙之土給其圻墁乃新祕殿祕殿孔碩黯其靈霽
屹其穹窿璇題互照以晶瑩珠網交疎而窈窕震殷雷
於滴瀝拖宛虹於楯軒忽隆門而陽開乍霞馭而雲蔚
儼若虛皇之御穆然太上之容疑馭氣以迴躋眇凌雲
而遐觀乃立高門高門有閤擬金闕之觚稜洞朱扉而
煥照龍章鳳策以之題署霓旌絳節茲焉出入乃建兩

序紛逶迤而重深乃起層樓邈岩亭而顯敞北彌郭隣
之路南亘姜邑之衢赫光影以燭坤麗丹青而薄野遠
如神運恍若化工每至日薄星迴歲之云暮桐華萍合
春聿載陽赤城旋軫之初白鶴會朝之際都人士女舉
袂成帷襲靈風而去洽天和仰卿雲而方知帝力豈
止百年猶畏獨識軒轅之臺三壽作朋永閱姜嫄之廟
大哉至矣無得稱焉夫妙本太無名垂不朽挺窮神知
化之盛然後顯通幽洞靈之微立尊道貴德之教然後

致還淳反朴之理漸于人為富壽被於樂為聲詩告於
太史為典冊著於豐碑為銘篆既光丕顯其在茲乎爰
命下臣敬書全德其詞曰

邈矣至道悠哉妙門龜龜無物綿綿若存是生清濁爰
闢乾坤乃生之民乃作之君德盛惟皇功高曰帝訪道
峒山求珠赤水下或知有時稱至理三正循環鴻圖資
始於惟基命赫矣皇唐運啟再造天垂百祥玄德升聞
既壽永昌時乘白雲至於帝鄉穆穆嗣君雍雍下武禮

極配天教明尊祖明發盡思儼然若覩敬佇仙遊式嚴
靈宇靈宇何在句金之陵丹霞夕映白霧朝凝重屋四
注崇臺九層雲生竒窕日麗觚稜三秀交陰五便分徑
丹砂流液玄洲立靖柳谷絢烟雷池寫鏡彷彿九華依
稀七映至誠則感有應斯來含真上客蕭閒逸才颺輪
倏忽晨蓋徘徊浮黎認土方丈凝臺昔在聖人建言數
教救物以慈奉身以孝敬佩真契恭聞大道顯妙用於
言象鼓淳風於億兆薦純嘏於無窮仰皇猷之克紹

池州重建紫極宮碑銘

域中之大曰道百行之先曰孝故孝心充乎內必道氣
應乎外於是有聿修之德追遠之懷揚名顯親之善集
靈徵福之舉用於邦國則臣節著施於家庭則子道光
以之為政則民從又以之薦信則神降福然則壇館之
作焉得已乎池州紫極宮者本東晉之普明觀也浸之
以秋浦鎮之以齊山北望陵陽竇真人飛升之所南瞻
九子費徵君棲隱之鄉玄風徘徊精氣交感代有奇士

居為殊庭既奉玄元之御因崇紫極之號治亂迭運隆
替不常戊午歲太守陳公始臨此郡歷頽垣而嘆息步
遺址而顧瞻役不徒興義將有屬公媯水洪派太丘舊
族重世避地徙居建安祖德門風冠映圖牒王師拓境
閩方即敘撫納歸附旌訪賢能惟我嚴君首奮奇節艾
夷逋穢弘濟艱難偏師所指無往弗克在十年之間由
裨將歷郡守登上公建齋壇功名之盛近古無匹及王
室多故邊城不寧復遣公督舟師率諸將萬里赴援三年

轉戰算無遺策兵不頓鋒威行軍中勲在王府舍爵再
命聿來是邦於是解甲釋兵頒條布政事從中興民用
接和會文賦詩彬彬然有儒者之風矣俄而王妣國太
夫人凶問至公孺慕出次烝烝永懷以為柔儀慈訓實
大吾族鞠育仁愛兼倍諸孫嘗藥弗親執紼且違欲報
之恩王事靡盬思所以薦祉於冥冥求神於希夷非龜
山之宮必易遷之館然則琳房金闕瑤壇檜井迎列真
之御資閭風之游仙經不誣勝事可作於是瞻星揆日

飭用庀徒散廡下之金出荆門之絹人百其力工薦其
能易其傾頽化以壯麗成於心匠不愆素期自某年月
鳩工至某年月訖事凡出錢若干萬築室若干間正殿
當陽三尊負宸享列宿之位於東序設三官之堂於西
廂嚴饋奠之室於艮維所以盡時思之禮敞開宴之庭
於乾位所以極坐忘之懷矢棘輦飛霞駁雲蔚璇題行
月煥城邑之晶光飛夢白日壯江山之氣色如是則颺
歛之駕不得不臨盱獰之福不得不集想見武夷之會

足申令伯之心至矣哉善慶孫謀無得稱已嘗試論之
曰神仙者君子之所歸也故真誥云至孝至貞之人皆
先受靈職次為列仙歲登降其幽明如人間之考績矣
若乃盡忠於君純孝於親敦惠於民歸誠於仙而不得
與夫餌芝朮醮星斗者同躋真階吾不信也勗哉夫子
其惟有終鉉扈駕南巡致禮名岳假道過此仰瞻久之
博我以文輒不遜讓其銘曰

我經池陽池陽既康化以至道民知嚮方乃新開館以

奉虛皇君子薦祉則惟其臧我登新宮新宮既崇深嚴
眈眈丹彩彤彤九華散影十絕盤空若在宣岳如遊閭
風至道不煩玄關甚邇孝享誠敬奉時祖妣善慶純嘏
施於孫子三茅二許夫何讓已流芳金石永永千祀

唐故道門威儀玄博太師貞素先生王君之碑

原夫至道之先邈哉稀矣書契已降可得而云黃帝堯
舜澄其源故垂衣恭己在宥天下伯陽仲尼導其用故
建言立德憲章無窮赤松羨門神而明之故輕舉上賓

留侯商皓變而通之故解景滅迹順是以下莫不由之
故有措紳端委利萬物於廟堂之上葛巾蕙帶全陰功
於塵埃之外隱顯殊致趨舍同歸其人有終其魄不死
閭風玄圃羣帝之密都赤城華陽仙聖之治所光靈胎
蠻若在左右仁人君子往往至焉見之於貞素先生王
君矣君諱棲霞字玄隱華宗繼世積德所鍾生於齊得
泱泱之風長於魯習恂恂之教七歲神童及第十五博
通經史闕黨童子靡敢並行東方諸侯為之前席而仙

林靈氣稟於自然塵纓世網不可拘係每名山獨往神
契感通奇怪恍惚衆莫能測天祐丁卯歲避亂南渡至
於壽春感四海之分崩想八公之遺跡於是解巾名路
委質玄門問政先生聶君師道見而奇之授以法錄是
日彩雲皓鶴翔舞久之既而窮方士之遐遊得東鄉之
勝境道無不在善豈常師又從威儀鄧君起遐受大洞
真法玄科聖旨動以諮詢福地仙源因而棲托誅茅穿
徑枕石漱流身既退而名愈彰道已寂而節彌苦桑田

自改桂樹長留烈祖孝高皇帝方在賓門實來作鎮紫
氣表真人之應青雲符好道之占君鵠書被徵褐衣來
見談天人之際講道德之源靡勞牧馬之迷自契順風
之問因從敦請來止建康有玄貞觀者陳宣帝為臧矜
先生之所作也殿堂岑寂水木清華遊焉息焉以遂其
好竹宮望拜玉牒祕詞叩寂求貞必君是賴嘉祥靈應
世莫得聞聖厯中興恩禮殊重加金印紫綬號玄博大
師烈祖常從容謂君曰吾不貪四海之富唯以蒼生為

念君對曰夫古之聖人修其身而後及天下待一人安而後安今天子勤勞萬幾忘寢與食身且不能自治豈能治蒼生哉帝善其言以百金為之壽其識度亮直又如此焉今上嗣清淨之基尊玄默之化諮諏賓敬有踰於前而君茅嶺夙心老而彌篤比年抗表請歸舊山優詔恤之又加貞素先生之號既而玉棺有命紫素告期葛洪見留不成大藥少君捨去先夢繡衣保大壬子歲夏四月甲寅隱化於玄貞觀春秋六十有二恩旨

痛惜賻錢二十萬道俗嗟慕會葬數百人初君之處茅山也即良常洞之前相當平山之下披榛剪穢面壑臨流除地為壇表朝真之位因丘設隧卜安神之室至是歸葬符夙願焉六月發自京師泝淮而上時畿內久旱川塗可揭是日大雨洪注騰波却流驀長隄踰重堰飄然利涉人不知勞昔周王有灤水之朝宣尼有四川之應校靈比德其殆庶乎君傳法度人數踰累百有若玄貞觀主朱懷名先入室道極嚴師首坐孫仲之章表大

德劉德先恭受經傳豈不可承受將絕之業願垂不朽
之風威儀王可久禮節董承虔並皆名刊貞石鉉也不
佞夙承教於座上繼決別於半途而誠心所感素交斯
在聊抒搔首之悲以俟遠城之歎詞曰

於鑠子晉上賓于天亦有令孫窮神體玄昔我來思世
稱其賢今我往矣人謂之仙至道希夷孰知其然華陽
洞府句曲風烟林芳橘葉地即芝田披文相質億萬斯
年

袁州宜春縣重造紫微觀碑文

若夫聖人有作沒而不朽畏其神而向其臺思其治而
愛其樹故尊道貴德玄化所以無窮高山景行後賢所
以不乏玄門光啓上士勤行書契已還煥乎丹青者可數
邦域之內表厥宅里者相望時運與并人境交得教之
大者其可忽乎袁州宜春縣紫微觀者蓋有晉鄧表真
人上升之地也左鍾山之奇峰右洪陽之仙洞巉巖千
仞蔽虧日月窈窕百里畜池風雨迴岡層巒崇其基坳

激湍澄谿宣其氣象真靈之所游集邑居之所走望皇
統中否下國尋戈仙臺盡夷靈宅多壞鹿巾霞帔藐矣
流離藻局黼帳翦焉墮廢而周德未厭漢中仍存舊物
既甄隆典咸復惟茲靈境將俟其人道士孫去華殖本
康樂之川從師新吳之邑清心鍊氣絕粒忘形三十餘
年具道彌固保大中自所居華林山館南游北鄉望佳
氣之鬱葱躡危垣之靡迤慨然歎息誓志終完於是面
壑依巖披榛築室勤身而感物應迹以化人鄉閭風隨

善信日至節以致用時而命工二十餘年厥功克就紺
殿特立重廊回合闢朱戶以瞰野峙瑤壇而在庭至於
像設之尊嚴仗衛之精麗廚廩之充牣居室之清閒洪
纖必周奢儉中度美矣顯績昭哉素誠夫褒善稱代春
秋之旨雖在遐遠人其舍諸監察御史李君思義奉使
宜春稅駕斯館睹厥成功嘉其秉心碑而揭之以文
求我言意難盡強為之銘銘曰

袁君之賢此州乃名鄧氏之仙此觀乃形春華麗絕真

氣融明允矣與壤居然福庭運逢交喪地有遺靈美哉
孫師興廢扶傾重閣金鑰還飛大鈴烟霞聚散颺歎逢
迎精誠所感大道方行用刊貞石永告雲扃

舒州新建文宣王廟碑序

鉉嘗讀文中子所著書竊觀其建言設教憲章周孔有
道無位故德澤不被於生民然而門人弟子如房魏李
杜輩皆遭遇真主佐佑大化元功盛烈亦云至矣猶以
為禮樂不興未能行文中子之道嗟乎使顏閔之徒遇

貞觀之世舉聖人之業成天下之務豈不益大乎時運
不並亨聖賢不世出可為長嘆息已矣夫太羹玄酒足
以通神明而不能競適口之味犬咸雲門足以和風俗
而不能高娛耳之聲五常六德足以興國家而不能勝
捷給之數釋菜合樂足以祈永貞而不能掩福田之說
李斯荀卿弟子也而為焚書之酷德彛文皇上宰也而
沮王道之議況其餘哉故用兵已來郊庠鄉塾萎而不
修者有年矣皇唐中興之一紀天子乃崇學校養庶老

舉六德教胄子旁達郡國靡然向風舒州古諸侯之封也其地廣其任重太博周公舊勲碩望來頒詒條武以貞師仁以行政動必資於前訓舉必順於人心前吏部郎鍾君頃登銓管之司實叅侍從之列論思典治必以名教為先洎從左官來為佐職神交主諾人無間然始一年而旱暵作二年而百穀登三年而上下和既富而教爰修廢典乃嚴社稷則播殖之功報乃祀箕畢則風雨之候時乃即黉堂謁先聖寢廟卑而將圯袞冕陋而

不度政之大者烏得已焉於是庀功庸示儀制堂與戶
牖巍乎大壯山龍藻火煥乎有章重門以深之周垣以
繚之俎豆升乎筵干戚由乎序佻佻衆賢是配是侑肅
肅燕毛以衍以樂間伍之屬耆幼之倫惠澤漸乎肌膚
風教移乎情性惜其所治者百城耳推是而往何所不
至哉鉉也不才放逐至此蒙地主之惠接故人之懽博
我以文宜無所讓屬役既具冠篇將畢會鍾君召還京
師祖行之夕視草以送且曰敬教勸學非大君子不能

行計功稱伐非大手筆不能任吾友紫微郎韓君即其
人也託之銘頌以永清風

騎省集卷十二

欽定四庫全書

騎省集卷十三

宋 徐鉉 撰

宣州涇縣文宣王廟記

昔夫子祖述堯舜憲章文武扶東周于已絕拯蒼生于
既墜其迹屈而道愈大其人亡而教愈遠則生民已來
未之有也其在祀典法施于人則祀之矧褒聖之祀其可
忽乎然則中人不足以語上下士聞道而大笑故斯教

也衰于戰國廢于嬴秦漢魏以降續而復絕夫仲尼曰
月重昏千祀非聖人孰能廓之故斯教也興於武德盛
于貞觀極于開元理自然也兵興以來大化墮替先聖
禮器委頓于勝廣之門闕里諸生恓惶于絳灌之下矧
厥祠宇之存廢乎天之愛人不當遂絕皇統再造六藝
始修太歲丙午重熙在運宣城雄鎮帝之叔父在焉故
幕府之選殊重尚書郎吳君光輔奉詔佐廉部兼理于
涇既泣事乃被儒服謁先師闕荆棘歷塤垣以造于第

茨之間仰瞻俯觀喟然而嘆於是奉開元之成制采類
宮之舊章經之營之是卜是築惟新祔殿儼飭辟容入
室升堂森然如在籩豆有位賓主有序表著咸列門衛
肅然于是青衿禮服之子有從師觀藝之場鯢齒鮐背
之徒識養老慈幼之節欣欣然其化之大者歟明年秋
君奏計如京師因得其實嗚呼聖人在上羣才畢舉使
三代之風達於里邑間不其偉哉余承君之歡美君之
志刊石紀事寘于祠庭後之君子無忘企及其餘理畝

籍察庶獄闢汙萊遏陂塘則有考功之吏在故不書於
時太歲丁未冬十月九日尚書主客員外郎知制誥徐
鉉記

復三茅禁山記

華陽洞天金陵福地羣仙之所都會景福之所興作故
其壇館之盛薦享之殷修奉之嚴樵牧之禁冠于天下
其所由來舊矣聖厯中微官失其守望拜之地多所荒
蕪若乃真靈翔集玄貺貯鑾興復之迹必假異人天祐

丁丑歲貞素先生王君棲霞始來此山恭佩上法徘徊
地肺偃息朱陽永懷舊規期在必復先生潛德內映符
彩外融名士通人道契冥會凡縞紵之贈善信之資悉
奉山門以成夙志於是由良常洞至雷平山十里而近
地入氓隸者盡購贖之芻蕘不得輒至墟墓不得雜
處藝樹蔽野植松為門川梁必通榛穢必翦建方壇于
雷平之上造高亭於良常之前朝修有致誠之地游居
有稅駕之所姜巴古陌秦望舊封肅然清光復如開元

天寶之歲矣先是紫陽之右有靈寶院焉真臺故基鞠
為茂草先生殫罄資用克構殿堂有開必先無遠弗
屆都督武陵康王奉錢百萬梁王造殿一區向道之徒
咸助厥事曾未周歲惟新舊宮皆先生之力也昔大隗
致襄城之駕庚桑化畏壘之人是知道心惟微其應如
響時則有若道士鄧若虛協規同志是攝是贊幹事以
恪感物以誠績用不愆斯實攸賴先生以保大壬子歲
夏四月悉書夫物之數疆畔所經請命於京師申禁於

郡縣以授茅山都監鄧君機一能事既畢數日而化期
命玄應昧者不知夫仙階感名諒非一揆若乃神清氣
靈骨錄標映受之于天也心虛氣冲玄德充蔚基之於
性也昭真垂教啟煥靈跡行之於勤也故策名紫素飛
步黃庭流功儲慶必參相合然則先生之道其殆庶乎
雖徽駕不留冥升日遠而高風可述遺範在人進而紀
之翰墨之職也鄧君企慕前躅見託真書已未歲秋八
月日記

宣州開元觀重建中三門記

夫清淨玄默道之基也宮館壇墀道之階也生知者因
基以成空勤行者升階而覩與故君子德業玄挺仁慈
積中必廣剔致之方乃形兼愛之迹為科誠以檢其情
性為象設以致其誠明情性平則和氣來誠明通則靈
符集由是登真正之境入希夷之域曠焉無際薰然太
和斯實興化致理之方還淳反朴之本豈與夫延方士
尚秘祝求長生以自奉者同年而語哉宣州開元觀遠

擬清虛獨標形勝敬畢崇峻鎮其後句谿澄澈經其陽
鍾一方淳粹之精結三素氤氲之氣當泰陵之尊道揭
聖厯於華題藹爾殊庭居為福地及運纏百六數偶三
災雖棟宇不踰而制度多闕靈蹤必復有待而興主上
嗣位之七年皇室在造之一紀今儲后徇臧札之操讓
德承平體間平之賢總戎藩服首台司而握師律鎮京
口而領宣城其為政也質以先正諮於耆老義以果斷
仁以發生民力不偷闕政咸舉而斯觀路門久廢遺址

將蕪非所以敬教尊祖會昌建福者也乃命執事即從
經度民多暇日府有羨財勤而不勞成而勿亟巨棟山
立層簷翼舒六扉洞開方軌並入重廊助其迴合祕殿
表其深嚴十絕之幡拂文楣而絢彩九龍之驂軋金鋪
而振響瞻之者有凌雲之氣經之者疑駕歟之游信足
以勵上士之進修福蒼生於仁壽既而功宣納麓望集
撫軍大壯之制斯成重離之位亦正貞符允塞盛德宜
書道士孫洞虛素業淳深至誠敦懇發揚真迹啟迪嘉

猷永為不朽之功願紀他山之石宮臣執筆以謹歲時
戊午秋九月庚申記

紫極宮新建司命真君殿記

夫金闕琳房不可階而升也惟至誠能通之靈符景福
不可企而望也惟至行能致之故君子行道於時宣力
於國敷惠於民貽範於家此人之極致自天所祐也又
况考集靈之地崇列真之宇薦納約之信勵勤行之誠
然則希夷眇邈超言象之表矣有若故司空相國馮翊

懿公承世功之緒襲重侯之業地親於副馬美繼於緇
衣便蕃臺閣夷險一致中立不倚金石貫其心唯力是視風
霜盡其節故四綜會府再踐中樞三殿方鎮一平邦土
慎終如始沒有遺忠激楚之樂雖窮通德之門不改嗣
子太僕少卿俊等祇奉慈訓弗敢失墜以為公之純誠
冲氣本道家者流而仁政令典近浹於三茅之境高齋
甲第夙鄰乎玄元之宮故棲神植福必先於是爾其治
城峻址西州舊署忠貞公之遺隴郭文舉之故臺九原

可作勝氣如在乃相形勢補廢闕建司命真君之殿于
宮之艮維披真蘊以立程集國工而考藝瞻星揆日不
勞而成崇高壯麗重深藻繪煥如也凝旒端簡負斧仍
几穆如也珠旒絳節紛披乎左右空歌洞章蕭寥乎晨
暮真聖以之而臨御純嘏以之而蕃錫賢人繼後孝子
奉先無以加於此矣鉉始以事分通舊從子弟之游終
以禁掖具員陪僚屬之末及公之啟手足也復忝國士
之許辱寄託之任知己之厚何日而忘短篇叙事蓋感

遇之萬一也

楞嚴院新作經堂記

君子才足以治劇惠足以安民見危致命以死勤事有一於此然後可以薦信于無方之神儲慶于必大之門噫楞嚴院經堂之作也其庶幾乎平陽柴君諱進思字昌美故太尉中書令尋陽靖王之孫也少而爽俊長而忠慤尤善騎射頗曉兵書靖王愛之出則典親兵居則專家政幹蠱之美宗族稱之王薨始為公臣累遷旅帥

鴻圖再造金革覆威上以其才能可任故以為內宴副
使乘軺建節將命四方盤根錯節所至皆治改鄂岳觀
察巡官知永興縣事縣有山澤之征權管之利歲終考
績倍于前人遷泰州軍事判官兼營田鹽監平蠹政決
庶獄勞農督課潔己律人民不告疲公有餘利除勸農
使復監池吉二郡護武昌軍千里晏安上流靜謐會梁
人入寇我武未揚東畿陷沒羣情震駭命君為行營應
援軍使率舟師數千鼓行而東平難濟口復海陵郡于

是淮泗之地聲勢始通乘勝長驅因迫隋苑前茅接戰
羣帥後期振臂奮身有死無二雖破竹之勢敗于垂成
而東道清夷本由君之一舉也江都克復歸葬京師天
子憫焉贈左千牛衛將軍賻贈加等禮也嗣子殿前承
旨廷遇等棘心在疚荼蓼兼倍以為苴麻苫苫飾哀之
期有終蒸嘗封樹追遠之禮有數復欲圖不朽之績徼
無邊之福則金仙之教世之所崇宗旨在于經文成容
存乎像設于是擇奇勝之地補闕遺之事創造經堂六

間塑地藏菩薩像一軀几席竹器之類華而備精而固
耽然其質煥乎其章深嚴足以遠世喧虛明足以味玄
旨其全節之風也如彼其集靈之所也如此然則冥冥
之祐綿綿之慶豈誣也哉余頃歲左官海陵君盡傾蓋
之分感忠臣之事主嘉孝子之奉親刻石紀事以聳善
也援筆悽愴無心於文保大丁巳歲春三月日東海徐
鉉記

攝山棲霞寺新路記

棲霞寺山水勝絕景象瓌奇明徵君故宅在焉江令公
舊碑詳矣高宗大帝刊聖藻於貞石紆宸翰於璿題煥
乎天光被此幽谷先是茲山之距都也五十里而遙方
軌並驅崇朝可至及中原構亂多壘在郊野無牧馬
之童岐有亡羊之僕義祖武皇帝潛龍茲邑訪道來游
始命有司是作新路金椎既隱玉馱言還桐山之駕不
追回中之道亦廢於戲聖人遺跡必將不泯微禹之嘆
夫何逮哉保大辛亥歲時安歲豐政簡民暇粵有寺僧

道嚴名高白足動思利人百姓莊思悰家擅素封積而
能散嗟亭候之不復憫行旅之多艱乃相與翦荆榛疏
坎窞闢通衢之夷直棄邪徑之迂迴建高亭於道周跨
重橋於山上鑿甘井以救暵立石表以指迷草樹風烟
依然四望峯巒臺榭肅爾前瞻由是江乘之塗復識王
畿之制矣余職事多暇屢游此山喜直道之攸遵嘉二
叟之不懈為文刻石用紀成功俾後之好事者以時開
通隨壞完葺此碣有泐斯文未湮不亦美乎其年八月

卷十三
一日兵部員外郎知制誥徐鉉記

常州義興縣重建長橋記

聖人作川梁以濟不通舟車所及纚連綦布若乃形勝
傑大名聞天下者亦無幾何陽羨長橋其一也夫英賢
之所躔次邑居之所瞻望山川之精粹宅焉里域之神
靈憑焉廢而興之圯而葺之豈惟備政足以徼福是橋
也徵諸圖牒則後漢邑令袁君創造國朝永泰中令立
君新之其他無聞焉中興之初邑有義夫曰吳濠吳須

率以私帑備加營務人賴其利踰三十載丙辰歲國步
中梗百越寇邊邑人敗之燒營而遁飛焰旁及宏梁半
摧甲寅歲著作佐郎劉君來為邑長視其制度知非民
力之所能濟乃狀其事白于有司上聞嘉之詔賜錢八
十萬君信而好古寬而得衆尉盧倩鼎甲餘慶俊造策
名政是以和事無不舉乃相與數王澤因民心備物致
用程工揆日器利工善材良事時戊辰歲冬而裁明年
暮春而畢長五十步廣七步對縣樓而直出跨荆谿而

橫絕丹雘其飾儼偃蹇而虹舒崇高其勢邈宕亭而山立
朱輪方軌駟馬連騎營營市井憧憧往來有衽席之安
無揭厲之患昔者乘車濟涉聖人謂之無教橋梁弗修
賢相知其不能以今方古勝負分矣夫書云考績傳載
稱伐庸庸善善其可廢乎刻之貞珉以示來者庚午歲
春二月十五日記

騎省集卷十三

欽定四庫全書

騎省集卷十四

宋 徐鉉 撰

重修徐孺亭記

至矣哉天之愛民甚矣雖數有治亂而常生聖賢故得其位則功加于時舛其運則教垂于後雖銷聲滅迹全身遠害不德而德普逃名而名揚擁篲築宮禮重于列國式閭表墓道光於無窮舉善而教政之大者也恭惟

我祖炳靈南國舊宅界乎仙館高臺時乎登陟孺亭之
稱海內瞻仰名公良牧代加崇飾千載之下猶旦暮焉
頃屬邦君非才敗我王度翦焉層構鞠為茂草噫百
世之祀誰能廢之庚申歲始建王都辛酉歲遂遷清蹕
肆觀羣后疇咨先賢餘基未傾偉人將至既而昂湖在
御桐圭錫壤丞相司空鄧王以茂親之重膺分陝之權
思老成之典型仰高山之景行罔言而信不肅而嚴乃
命經營將從締造九成方起百堵未周甲子歲入秉

國鈞以武昌連帥侍中濟南公代司宮鑰公致用以武
從政以文祇奉肅規率由周禮再廢成制詳考舊基夷
坎宮而就平裨崖岸而增固乃崇堂與乃加藻績右嚴
罇玷之序左設庖膳之區前臨康莊旁眺城闕平湖千
畝凝碧于其下西山萬疊倒影于其中依然懸榻之場
想見致芻之狀與夫洪崖之館絢綵于烟霞滕王之閣
騫飛於雉堞南州之物象脩矣前哲之况靈萃焉嗟乎
君子興一役建一事于時必可頌於後必可觀茲亭之

作也都人朋悅過賓矚目紀于方國之史播于樂職之詩鉉也幸承燕翼之謀獲叅翰墨之任俾垂不朽敢憚蕪音

喬公亭記

桐安城北有雙溪禪院焉皖水經其南求塘出其左前瞻城邑則萬井纏連却眺平陸則三峯翠積朱橋偃蹇倒景於清流巨木輪囷交陰于別島其地豐潤故植之者茂遂其氣清粹故宅之者英秀聞諸耆耄喬公之舊

居也雖年世屢遷而風流不泯故有方外之士爰構
經行之室回廊重宇眈若深巖水瀕最勝猶鞠茂草甲
寅歲前吏部郎中鍾君某字某左官茲郡來游此谿顧
瞻徘徊有懷創造審曲面勢經之營之院主僧自新聿
應善言允符夙契即日而裁逾月而畢不奢不陋既幽
既閒馮軒俯盼盡濠梁之樂開牖長矚忘漢陰之機川
原之景象咸歸卉木之光華一變每冠蓋萃止壺觴畢
陳吟嘯發其和琴棊助其適郡人瞻望飄若神仙署曰

喬公之亭志古也噫士君子達則兼濟天下窮則獨善其身未若進退以道小大必理行有餘力與人同樂之為懿也是郡也有汝南周公以為守有潁川鍾君以為佐故人多暇豫歲比順成旁郡行再雩之禮而我盛選勝之會鄰境興闐戶之嘆而我賦考室之詩播之風謠其無愧乎余向自禁掖再從放逐故人胥會山水窮游良晨美景賞心樂事有一於此宜其識之立石刊文以示來者于時歲次乙卯保大十三年三月日東海徐鉉

記

毗陵郡公南原亭館記

人生而靜性之適也若乃廟堂之貴軒冕之盛君子所以勞心濟物屈己存教功成事遂復歸于靜用能周旋於道常久而不已者也有唐再造俗厚政和人多暇豫物亦茂遂名園勝槩隱鱗相望至于東田之館西園之墅婁湖張侯之宅東山謝公之游青谿賦詩之曲白楊飲酒之路風流人物高視昔賢京城坤隅爰具別館百

畝之地芳華一新舊相毗陵公習靜之所也其地却據峻嶺俯瞰長江北彌臨滄之觀南撫新林之戍足以窮幽極覽忘形放懷於是建高望之亭肆游目之觀睨多鳥于雲外認歸帆于天末四山隱現而屏列重城邈迤而霞舒紛徒步而右回闢精廬于中嶺倚層崖而築室就積石以為階土事不文木工不斲虛牖夕映密戶冬燠素屏麈尾棐几蓊牀談玄之侶此焉游息設射堂於其左湛方塘於其下虛楹顯敞清風爽氣襲其間綺岸

繁迴紅藥翠苔藻其渼至於芳草嘉禾修竹茂林紛敷
翳蔚不可殫記凡廐庫之望廚廩之區賓燕所須不戒
而具每良辰美景欣然命駕羣從子弟結駟相追角巾
藜杖優游笑詠觀之者不知其為公相也古人有言朝
廷之士入而不能出況於輕鐘鼎之貴徇山林之心將
相之權不能累其真肺腑之親不能係其遯道風素範
豈不美歟又以鉉無事事之情有善善之志見徵拙筆
用勒貞珉是時歲次辛酉冬月十日記

劍池頌并序

歲次辛酉月躔仲冬王人徐鉉揚旌銅柱之鄉稅駕劍池之廟慨嘆靈迹徘徊故墟或曰龍泉太阿安得為寶出也不為當世之用佩之不免亡身之災天下固有虛名而無實效者歟愚以為不然夫聖人之於天下亦物耳所稟受者異故能與造物者並而為天下王是以聖人之作也天不愛其道地不愛其寶同聲相應同氣相求人謀鬼謀皆為聖人用無功無迹豈尋常所能識乎

然則集陰陽之英萃山澤之精窮爐冶之妙極鋒鋌之
利宜其冥合玄造弼成聖功者也昔黃帝法月滿而鑄
鏡用能炤燭怪魅辟除不祥大禹收貢金以鑄鼎使民
知神姦以遠不若漢高祖佩斬蛇之劍以撥亂除害奄
有天下是以三者皆人力所為也咸能輔佐興運與時
隱見其可誣乎在昔三分叔世咸有昏德天命將改寰
宇將同斯劍知之故靈發於下氣浮於上應帝王之符
命矚識者之觀瞻亦猶伊尹負鼎於莘墟仲尼動色于

魯相千載一會聖賢所以汲汲也向使晉武能誕若天
意克明峻德判忠邪之路絀驕侈之心則賢能盡其才
神靈効其用淳耀之烈可續七百之期不爽而王猷既
鬱亂本既成百姓失望羣龍沮色於是斯劍也委質張
雷之鑑一泄其憤遠迹劉石之醜復歸於潛其出也所
以示神之不亡其去也所以示唯德是輔則其為用也
遠矣昔者周過其數秦不及期是知天命之精微可以
人事而延促前哲論之脩矣若夫精真之誠修于內感

名之致應乎外自然而然有道存焉不可以智求不可
以言達王者得之則三五之功其餘事耳然則天下至
寶本非人臣所服變化無方神物之事也忘身徇國
忠臣之節也兩造其極求仁得仁復何怨乎廟在豐城
故縣俯瞰池岸狀武侯雷府君之象祀焉去今縣四十
里而龍泉太阿之廟別在中路棟宇綿久皆將傾頽邑
人朱憚等洽重熙之化感百世之祀獎率同志唯新壽宮
千載光靈煥然如在縣令孟賓于尉孫舉皆以文行之

懿中賢良之選接武連事惠此王畿推誠於民薦信於
神風雨不愆耕鑿咸若先賢遺躅其不泯也宜哉是池
廣不終畝深才數尺父老云近歲暮旦往往有雲霧蒙
覆其中恍惚之理不可測已今中興三葉聖政惟新豈
非靈命孔昭玄貺將集天命不易弘之在人使臣司言
敢告有位乃為頌曰

周室既衰仁獸來臻晉祚不融龍劍効珍神化無方天
命無親德之不建與運俱淪歸潛厚載以俟真人惟劍

之神惟賢之識湛湛靈沼綿綿廟食瑞氣長在玄符靡
測垂茲頌聲永永無極

九疊松贊

并序

桐安郡南二十里古城南隅有松焉曲拳擁腫勢若九
疊交柯聳幹無不蟠屈者其地高迴旁無壅閼莫知其
何由如是或曰下有頑石根不得舒氣脉債興故為此
狀好事者以為盛觀焉余始聞其名今至其下睹之而
貽曰嗟夫草木麗地稟天之和條暢秀茂固常也若乃

原隰之宜失陰陽之候違柔脆之姿則離披枯瘁貞勁之質則鬱抑盤錯生理乖矣獨有瓌奇之貌嗚呼失其所乎昔在太古君臣強名賢愚同域洪洪洞洞是謂太和降及後代聖人有作顯仁義建功名扶衰拯弊不得已也於是有愛惡則象生焉其甚者飾行以矯時執方以違俗考槃閭巷聲重王公上德喪矣獨有高世之譽嗚呼荀孟屈賈之徒豈斯松之類邪感物徘徊因為之贊吁嗟彼松孰為而生天枉其性屈折其形人實我貴

我非所營噫嘻淳風曷歸大道安行吾欲與汝各全其
真作此好歌以告騷人

硯銘

他山之石是斲是治荆藍表瑩雲露含滋執簡而至磨
鉛在茲言出乎身文以行之噫嗟君子慎爾樞機

野老行歌圖贊

昔在陶唐光宅萬國不識不知帝乎何力鼓腹擊壤嬉
遊無極自然而然忘適之適中古道薄親仁懷德末世

政亂姦宄寇賊淳風不還可以嘆息丹青志石存諸往
則嗟爾有位鑑茲玉式

四皓畫贊

君子道行必資其位邈哉四賢隱居救世皤皤之貌丹
青假志爾無素飧覩此知愧

許真人井贊

長史含道棲神九天人非邑改丹井存焉射茲谷鮒冽
彼寒泉分甘玉液流潤芝田我來自西尋其紫陽若愛

召樹如升魯堂敬刊翠琰永識銀牀噫嗟後學揖此餘光
高侍郎畫像贊

穆穆清真不淄不磷文高學富道直誠純昭質已邈斯
猷愈新丹青畫像以永光塵棠陰峴首瞻仰霑巾

文獻太子哀冊文

維顯德六年太歲己未九月癸卯朔四日丙午文獻太
子薨於東宮延春殿以某年十二月壬申朔十三日甲申遷
座于文園禮也象輅差階龍樓向曙肅仗衛以將引儼鐫

壘而不御主上感深守器念極賓天痛玉符之靡召悲銀
榜之空懸詔下臣子信史載盛烈于瑤篇其詞曰

皇天眷祐錫唐良輔時惟宗英裔自文祖孝弟敦懋機神穎
悟昔在中興爰當就傅申畫宛水錫茲茅土德望日躋邦家
是毗勾陳宿衛宮籥攸司於惟淮甸實始皇基道之以禮董
之以威俗賦甘棠之頌人歌樂職之詩運屬繼明業隆二聖
首輯瑞玉來參大政乃為左相其班上台乃封夏口其賦千
乘赫矣元后蒸哉古風不私其子天下為公並命仲叔奮茲

顯庸或踐我舊藩或陟爾青宮辭不獲命處之益恭晉鄭之勲
推而更融臧札之操久而彌崇若太伯之讓異周公之東京
江汝水旒節從容皇統既正靈符允答國步清謐羣生欣洽
復大道於三古永文昭於萬乘越我嗣君尊尊親親極以呂
望之高位崇以貞觀之舊稱賜書不詔贊禮不名曰予
小子實繫叔父維藩維翰宗社之故永錫難老日新王
度謂天益高命亦靡常台階隕宿河月沉光慟東堂之
哀臨輟南國之春相與聖賢之共歎獨天地以何長嗚

呼哀哉知人生之若寄臨凶奢于屢炭舉士庶而均哀頌聲
猷於無間嗚呼哀哉歸虎節於王府靡鸞旌於雉門開
西園之風月慘緱嶺之烟雲象輅迴兮遵塗總帷整兮
遠逝枉矢流蒼震之野火耀奄前星之次捨內豎之問
安進浮丘而把袂九重增慟萬邦銜涕冥茫少海之波
寂歷滄雷之肆嗚呼哀哉感神飈之遠至嘆芳歲之云
徂違太學之齒胄啟佳城而下居建采章于綢練儼備
物於塗芻經武帳之芻蒭據青龍之鬱紆嗚呼哀哉苦

霧閉塗窮陰殺節重雲之旭日如晦大壑之層冰似雪
指京口而不臨背都門而永訣萬目愁而旆旌慘羣心
感而笳蕭咽嗚呼哀哉瞻瑤山之落木聽玄圃之迴風
臺思子以何極宮長男而遂空禁荆門之故吏會商嶺
之悲翁淚淋浪而洒袂氣怨結而盈胃嗚呼哀哉歷遠
古以遐觀考令猷於三善孰仁孝之昭著復功名之不
顯惟筆史與吐頌配長天而日遠寧騁麗於東田豈馳
能於文選嗚呼哀哉

齊王贈太弟哀冊文

維年月日天策上將軍太師尚書令臨川牧齊王薨于
臨川府之正寢主上追先王託付之意表叔父遜讓之
風乃下明詔冊贈太弟即以其年十一月日葬于江州
某縣某鄉廬山之原從理命也絹幕夕陳虞歌曉引改
兔園之賓館設龍樓之陞楯聞靈儀以愈遠窮哀端而
靡盡愴永恨於宸襟俾誕揚于令問淇水奔兮綠竹盡
泰山頽兮古木寒賓友散兮霜雪積巾箱故兮經籍殘

嗚呼哀哉身歿名存道悠運促贈今日之典冊閱當時
之寶玉全大義以經國激清風而被俗遺昭烈於千齡
寄玄堂於陵谷嗚呼哀哉



騎省集卷十四

欽定四庫全書

集部

騎省集卷十五

詳校官司業

臣納麟寶

檢討

臣

何思鈞覆勘

總校官進士

臣朱

鈴

校對官學正

臣周

銳

謄錄監生

臣朱

封

欽定四庫全書

騎省集卷十五

宋 徐鉉 撰

唐故左諫議大夫翰林學士江公墓誌銘

公諱文蔚字君章其先濟陽考城人也昔高陽恢若水
之靈光有萬國伯益獲箕山之護克成夏功故其子孫
延祚丕顯茅土錫胤圭組流光在漢者為孝子在宋者
為忠宰在梁者為烈將在陳者為詞臣長城既封淮水

亦絕辭周粟而遠驚避羸亂而深藏徙籍建安世為大
姓至於我王考毗考秦皆以隱德清操垂為門風惟公
嗣奕葉之賢稟生知之異幼挺奇表夙韜殊量殫儒墨
之秘奧窮文史之菁英閭里歸仁宗黨稱孝于時天下
未一遐方不寧公鄙尺鷃之為從黃鵠之舉類延州之
觀樂同太史之探書升名俊造從事河洛衰俗難佐天
壤不支我烈祖孝高皇帝王業始於江東仁風被於四
裔公杖策高蹈歟闕來儀府朝肅以生風臺閣藹其增

氣署宣州觀察巡官試秘書郎遷水郎員外郎賜緋魚
袋王國初建改比部員外郎知制誥於時天人協應獄
訟攸歸舜禹相與言游夏不能措潤色之任也我則無
慙既受禪遷主客郎中知制誥如故俄而真拜仍賜金
紫今上嗣位大禮聿修徙公為給事中判太常卿事時
同軌胥會有司失職公與司門郎中蕭公儼博士韓君
熙載協力建儀周行翕然由是祖功宗德之位定大行
昭名之義允功署高廟與天無窮明年拜御史中丞矯

枉持平無所顧憚坐廷劾宰相其言深切貶江州司士
叅軍初國朝自王魏之後曠數百年憲署之舉間無廢
職然未有危言激論如此之彰灼者也故權右振竦朝
野喧騰傳寫彈文為之紙貴人心既爾天鑑亦迴前所
劾者或免或黜公就加江州營田副使頃之徵為衛尉
卿俄拜右諫議大夫充翰林學士權知貢舉出納密命
樞機靡失登進造士衡鑑無私聳禁署之清風著春官
之故事薦賢之賞行及於台司曳杖之期奄先於朝露

春秋五十有二保大十年八月二日卒于京師官舍皇上痛惜為之廢朝送死恤孤一從公賜有司考行易名曰簡即以其年九月十三日葬于某縣某里之原禮也長子翦秘書省正字次子騫皆早卒今以從子翹為嗣嗚呼哀哉公心平氣和貌古神正雅好玄理有方外之期尤善詞賦得國風之體去華簡禮不以位望驕人矜才誘善不以威名傲物操履堅正靡得動搖襟懷坦夷初無蒂芥謫居江楚恬然自足孜孜色養蒸蒸孝心嘗為

詩云屈平若遇高堂在應不懷沙獨葬魚此其心也江
州節度使賈公崇以武立功以剛肅物事公如師傳親
公如兄弟時皆服公之重名而賢賈之樂善也既歸京
寓居公廨無以家為二子繼亡一慟而已齊死生於夢
覺遺寵辱於錙銖古之達者何以過此嗚呼凡我僚舊
均哀共戚入黔婁之門閭覽伯喈之經籍睇落日以流
慟愴秋風而沾臆企景行於高山勒哀詞于紫石其詞

曰

高陽之裔伯益之孫展矣君子載大其門爰翔爰集樂
我樹檀影纓幕府振藻西垣禮儀卒獲風憲攸端道行
在時業隆自我英英若人見義必果直指烈烈宮鄰瑣
瑣死生以之何適不可允矣天鑒明哉主恩乃還宣室
乃入修門從容禁署密勿王言得才為盛知人則難暫
為宗伯載善其官人必有終古無不死嗟嗟若人風流
永矣徐庶有母鄧攸無子闕里諸生荊州故吏謂之何
哉嗟其泣矣秋風落木逝水成川昨朝飛蓋今日荒阡

一丘殘照萬古愁烟素車自返寶劍高懸高才兮直道
共盡分何言

大唐故中散大夫檢校司徒使持節泰州諸軍事

兼泰州刺史御史大夫洛陽縣開國子賈宣公

墓誌銘

公諱潭字孟澤洛陽人也周先同姓即列國之諸侯漢
得名臣乃洛陽之才子攀鱗河北豈須方面之功借筋
譙都自有良平之策源長派遠德厚流光史不絕書後

將必大當先天之內禪也我七代祖黃門侍郎平陽公
魯實演丕命及至德之中興也我六代祖黃門侍郎晉
國公至實贊大猷曠古已還一家而已五代祖孫衡州
刺史高祖種司門員外郎曾祖昶太子司議郎祖琛河
南密令皆有韜世之量濟衆之仁大位不躋餘慶斯洽
考勩以經術擢太常第以才用為諸侯卿捍寇輸粟有
勞王室於是佩金紫升朝廷上疏論邠寧節度王行瑜
恃功恣橫坐貶愛州掾及行瑜就戮優詔徵還復出常

州刺史鹽鐵江淮留後屬宗社中絕官司解弛計吏未
上哲人其萎公有世德之資負夙成之器風神爽邁智
術通明景福二年以學究一經射策高第釋褐京兆府
叅軍事遷秘書郎侍從南遷進修不懈天祐丁卯歲居
先君憂服喪過哀宗黨稱孝楚泗郡守宣城廉使虛左
交辟三府馳名俄而內艱戚憂如禮義祖武帝創基分
陝側席求才素與公周旋即加命禮奏記書檄一以委
之內贊謨猷外為詞令出應盟會入陪樽俎霸功光赫

公有力焉十有餘年任用無間既而楚雲告變穆醴不
陳已酬國士之知亦得退人之禮改宣池觀察判官烈
祖高皇帝受命中興不忘舊德徵拜秘書少監充儀禮
副使遷中書舍人崇英翰林學士周慎密命潤色王言
公望無渝朝獎彌厚保大嗣統拜兵部侍郎知制誥學
士如故充永陵儀禮副使同軌胥會大禮無違遷兵部
尚書修國史考定郊廟之樂褒貶歸正擊拊允諧會遠
兵南侵天眷北顧命公持節使於契丹宣大國之威神

得諸邊之要領及軺軒還軫而控弦出塞矣報命稱旨
時論具瞻于是避寵台衡就安關輔除泰州刺史視事
數月丕變土風構疾還京保大六年九月二十有一
日卒于江寧永安里官舍享年六十有八皇上軫悼再
不視朝飾終之禮務從加等太常考行賜謚曰宣以某
年月日葬於某所與夫人楊氏合祔焉禮也長子朝散
大夫行大理司直彬次子泰州司倉參軍穆少子修等
咸負當世之才皆為保家之主種德垂範未易可量長

女用文適水部員外郎楊元鼎不幸早世次日用柔適
膳部員外郎知制誥張緯次日用光適進士姜某少曰
季芳尚幼惟公事業富壽昭映一時族望婚姻熏灼當
代自非天監與善孰能若斯雖大用未光而能事畢矣
鉉以世親之舊執隨行之敬服義承教惟公在焉刊勒
論誣蓋感遇之萬一也其銘曰

於惟茂族實有世德七葉繼軌嘉猷允塞亶矣君子其
儀不忒修辭立誠以匡王國言以文行兵由威克東畿

之政為邦之則天地長在春秋代逆今朝喪善何日生
賢萬里誰地佳城許年永安舊里門館依然寢丘傳邑
京兆開阡勒名泉石以配青編

唐故泰州刺史陶公墓誌銘

公諱敬宣字文褒其先潯陽人因官從籍今為合肥人
也西京作相開國封侯於是貽孫南國主盟長沙公茲
焉不朽籬邊黃菊解縣印以言歸嶺上白雲挂朝衣而
不返光靈攸屬固無得稱之丹青所存可畧而言也高

祖復右監門衛將軍曾祖琳建州錄事叅軍祖晟青州
博昌縣令皆天縱其能世濟其美韎韐君子屈迹於驍
遊縉紳先生折腰於州縣積善餘慶明德後興考雅武
昌軍節度使贈太師楚惠公雲雷構屯龍虎冥會橫
琱戈而蕩寇功冠一時裂鷄尾以䟽封禮優萬戶公即
太師第四子也幼而岐嶷長而俊茂非禮勿動時然後
言天祐中門廕起家太子校書遷至府長史賜緋魚袋
丁先公憂時年十四孝心昭感喪禮無違釋服除都官

郎中賜紫金魚袋改大理少卿青縑寓直時推伏閣之
勤丹筆持平人絕署門之歎俄遷江都少尹趙張治劇
由來表則之司淮海分疆自昔輕揚之地公處之貞固
行以廉平愛民則忠事長以順一圻欣賴三載有成遷
大理卿仍兼尹事烈祖孝高皇帝允釐百揆實總六師
爰求鄭國之良以貳楚人之廣奏請君判左右軍事丁
酉歲堯咨文禪禹迹中興徵舊德於角屏考官成於喉
舌拜工部尚書今上嗣位加金紫光祿大夫檢校太保

會聞人作梗王旅欲南聲實所資豫章為急故輟公副
總判軍府及羽檄四出芻輓相尋民以悅而忘勞事有
脩而無患嶺表既定洪人亦康復移宛陵仍兼棣州刺
史海陵郡甸服之地邦賦最優歲比不登民用胥怨除
泰州刺史公以清淨為理仁恕積中視吏民其如傷守
法令而畫一餘糧棲畝無虞癸之呼白駒過隙感辰已
之歲春秋五十有二保大八年夏四月十有八日卒于
位上省奏傷悼輟朝兩日有司考行賜諡曰順即于其

年月日權窆于東都明年某月日葬于江都府縣里與前夫人合祔焉禮也惟公冲和體質仁孝為基立身有常與物無忤尤善聲律聞音而知樂頗好篇詠下筆而成章身後不留餘財所任必有遺愛求之作者斯亦難能嗣子泰州司倉叅軍崇鼎崇諒崇倫等皆勤修令名夙奉成訓君恩靡替家法如初鉉昔在朝行實惟舊好今從左宦仰翳東道痛死生之已矣感意氣以何報延陵挂劍願保於不欺峴首刊碑終慙于絕妙銘曰

淮淝之靈衡霍之精必有賢傑為時而生乃伯乃仲乃
侯乃卿望冠六事風馳百城人生有涯大命夙傾不見
君子猶存鄭聲遠日既吉靈輶既行寂寞公館蕭條古
垆哀哀郡人涕泣沾襟嗚呼彼蒼不知福善之胡明

唐故金紫光祿大夫檢校司徒行少府監河南方

公墓誌銘

公諱訥字希仁其先河南人也後世從官徙籍新安支
派繁衍遂為郡之著姓迨公數世皆以儒雅退讓播為

門風曾祖顯登州文登縣令祖亮左武衛兵曹參軍考
較榮王府司馬母聶氏追封河南縣太君問政先生師
道之長女也公承積善之慶負夙成之智砥節礪行好
學能文時然後言非禮勿動鄉曲之黨翕然稱之太師
陶公來守新安撫納人士署為郡吏委以典籤恪恭詳
敏甚稱所職歷事累政其志如初烈祖肇基王業元宗
實綜軍政管記之任勤擇其人聞公之名召至幕府王
國初建署寧國軍節度館驛巡官掌都統表奏皇室再

造慶賞遂行擢拜虞部員外郎掌元帥表奏數歲以皇
孫就傳命公侍讀講道贊德勵裨益之誠端已直躬盡
表微之節俄遷水部郎中明年皇孫封南昌王東都留
守以公為留守判官遷主客郎中叅贊政務事無違者
改司農少卿依前充職明年王移任宣任二州大都督
復以公為浙西營田副使通判軍府六載匪懈庶職交
修懋官之賞詔命疊委累遷至金紫光祿大夫檢校司
徒封河南縣男俄拜泰州刺史充本州屯田監院使正

身而令悉心為理公無遺利民自從風屬強敵深侵東京失守而州兵盡出人心大搖於是士庶老幼盡室南渡公自歸闕下坐是除名數年除歙州團練判官上曰戰爭之際吾豈以武勇責書生哉軍法不得不爾即召拜太子右諭德今上嗣位遷少府監丙寅歲正月十六日卒于京師美仁坊官舍享年七十七上為之廢朝一日賜諡曰定以某年某月日葬于某所禮也前夫人謝氏早亡繼室施氏封沛縣君長子前宣州寧國縣主簿

次子志饒州文學公以名教為樂以矩矱自任行必中立居無惰容搢紳之間推為純行公之外祖得道之士故公頗以朝禮修養為務鷄鳴而起孜孜不倦年俯悼耄體常康強及屬纊之晨無伏枕之疾斯亦力行之報也鉉也不佞早辱交契昔先君從事黟歙公適仕本郡及公策名郎署鉉亦忝官聯既熟其素履願垂于不朽附于史氏以永令猷其銘曰

聖人四教文行忠信惟公似之光有令問秉筆贊畫登

朝典郡寵至若驚道喪無悶年俯中壽官叅列卿歸全
委順終吉永貞宰樹長在高臺自傾用刊圓石閱此佳
城

唐故客省使壽昌殿承宣金紫光祿大夫檢校太
保使持節筠州諸軍事筠州刺史使本州團練使
汝南縣開國男周公墓誌銘

君諱廷構字正材洛陽人也岐山至德綿瓜徙者萬
邦洛宅舊都守枌榆者百世簪組相繼譜牒存焉曾祖

侃太常博士祖潛涿州樂壽縣令避亂南徙因家廣陵
考延禧明經擢第有吳之霸受辟為淮南巡官累官至
戶部郎中與殷文公游貞公同掌文翰無祿早世故大
位不躋君即戶部第四子也幼而岐嶷長而篤厚躬行
孝悌餘力學文以廡釋褐補弘文館校書試吏為池州
司戶叅軍改宣州寧國縣尉烈祖在藩乃瞻舊族聞君
修復有吏能因表為黃州長史寵以朱紱置之府朝及
受禪遷通事舍人鴻業肇興王澤遐布贊導之任實寄

司聰護戎修聘觀風按獄受命而出動罔不臧歷事兩
朝任遇彌厚賞賜既數階勲累遷而通事之任如故蓋
惜其能也保大七年轉將作少監判四方館事浩穰之
地尹政為難復以本官判江寧府事其間監諸侯之典
者十通四方之命者三攝州府之政者六按枉撓之獄
者四或敷惠于新附之俗或投身於危亂之地本於忠
而後動忘其生而後存元宗嘉之以為客省使今上嗣
位深惟舊勞特加金紫光祿大夫台州刺史常御壽昌

殿視事中外之人咸得引見又以君為壽昌殿承宣出
為忠義軍監軍泉南等州宣諭使還遷筠州刺史本州團
練仍使充客省使君以脩嘗艱危復逼遲暮懇辭繁劇
恩旨不從丙寅歲十月二十二日終于京師某里之官
舍春秋六十有六詔廢朝一日賜諡曰某明年正月日
葬於某所禮也夫人天水縣君姜氏輔佐之勤率由婦
禮訓誨諸子脩有義方子大理評事宗儉太常寺奉禮
郎宗素及宗順宗信等皆儒謹且不墜其先鉉家世通

舊嘗接姻婭淡成之交終始不渝何以寘懷是用刊德
其銘曰

猗嗟周君世濟其名展如之人克嗣厥聲受任幹蠱臨
難忘身居中處約全和保真與物皆化萬古同塵松楸
勿伐蘭菊惟新刊石表墓吁嗟善人

唐故朝議大夫行尚書禮部郎中柱國賜紫金魚
袋太原王公墓誌銘

君諱某字某其先太原人也昔者諸侯共職起末運於

髡王諸后上賓示靈期於瞽史緱山維岳啟翦賁之崇
基汾水遂荒導沉渾之遠派其後金行云季貴種言還
行者制禮樂於土中處者保丘園於淮左世濟之德鄉
人所宗故今為廬江人也曾祖廬江令祖洪州長史皆
有廉讓之風純粹之行得祿於仕不累於高考吳尚書
左司郎中贈太府卿負適用之才獲愛人之譽應星辰
而列位道邁朝倫會河海以命官禮優贈典君則府卿
之第三子也門風漸教天質孕和翼翼服勤真保家之

主情悖若訥多長者之言墨妙筆精固稟于性奕思琴德咸是所長幼有令聞獲鍾慈愛及加冠之歲以門子叙資漢室孝廉方從令史晉時英俊更屈下僚晨昏之養有歸州縣之勞靡憚乾貞二年自黃州司馬遷洪州都督府別駕治中懋績屏星煥其增華公府見知佩刀由其受賜俄拜尚書度支員外再遷虞部郎中皆判吏部兵部事夫當官匪懈伏閤之勤也照奸得情坐曹之能也前史所翫君皆則焉頃之以親累解官君雅好玄

言夙尚閒適由是角巾私第閉關却掃交游罕得見其
面窮達不以介其懷用晦而明居貞以利高皇帝受禪
之始牽復疏恩拜工部郎中轉禮部郎中寓直中書省
預聞機密彤庭宏敞禁垣清切絲綸之出堯言于是惟
行樞機之微省樹由其勿洩方將振鱗溟渤驤首雲雷
而生也有涯仁而不壽昇元六年夏六月二十有六日
卒于建康翔鷹里之官舍享年五十有一嗚呼哀哉惟
君孝于事親悌于承長和以接上廡以在公胥吏臣僕

靡不被仁恕之惠家人妻子未嘗見喜愠之容學古觀
書如恐弗及卹舊敬老周知其疲三德聿脩五福斯闕
卽世之日遺愛存焉卜遠不從旅殯京邑後四歲春二
月五日嗣子延紹延貞等始脩大葬之禮窆于江都縣
某鄉里從先鄉府君大塋與夫人李氏合祔焉禮也鉉
以世親之舊承子妻之知怨明德之不當痛祖行之斯
在退食自公薄送于畿刊貞石以爰紀庶令名之不虧
嗚呼哀哉其銘曰

汾州溶溶淮源颿颿興我宗兮世濟其美家餘其慶生
我公兮靖恭正直言行名迹存南宮兮與義相扶知命
不憂永考終兮邦城之右蜀國之陽馬鬣封兮道不虛
行有令之子遵遺風兮

唐故奉化軍節度判官通判吉州軍州事朝議大
夫檢校尚書主客郎中驍騎尉賜紫金魚袋趙
君墓誌銘

君諱宣甫字仲申其先天水人也累世從官不常厥居

曾祖全真工部員外郎滕州刺史祖倚太子校書考台
歙州海寧令君即海寧府君第三子也生于廣陵長于
江左幼而俊敏博綜羣書尤善名法之學烈祖輔政方
申明紀律君以是中選釋褐補江都府文學直刑部明
年改信州司法叅軍察獄祥刑號為詳練久之召赴闕
以本官權叅元帥府法曹事踰年改大理評事元宗嗣
服之初精心庶獄權要舉不附已者因中傷之君坐黜
為饒州司士叅軍明年王師伐閩護軍查君表君才可

煩使以本官判軍司事時頓兵深入自冬涉秋經束馬
懸車之塗督飛芻輓粟之役事集師尅君有力焉師還
加朝散大夫行常州義興令推誠率下民用協和丁憂
去職復為江州錄事叅軍時連帥議浚湓浦以屯舟師
詔從之君以無益戎備而勞民力乃指陳利害抗疏極
論上甚嘉之即命止役由是遷大理司直通判蘄州軍
州事明年遷檢校水部員外郎充建州觀察推官通判
軍府事會越人闕邊使間誘建民將以為亂君廉得其

實盡按誅之優詔褒美賜衣一襲遷檢校屯田員外郎
三年徵拜守水部員外郎判度支時師旅游興軍食不
給命君為沿江催運使詔傳所至轉輸如流朝論以姑
熟居畿甸之間實供億之始徙君為當塗令踰月復徵
為主客員外郎判大理寺賜紫金魚袋始君以理官得
罪至是上知其無私故復任焉守官循理挺然中立轉
工部員外郎仍判寺事今上嗣位上疏論時政以為刺
史縣令親民之先而考績掄才未盡其理上深然之遷

朝議大夫戶部員外充宣歙常潤等道安撫使以刺舉
無避為權臣所排宸鑒昭明故得無咎使還以本官判
兵部事廬陵羣盜充斥州兵不能制上憂之亟命君為
奉化軍節度判官判吉州事轉主客郎中擒姦摘伏克
舉其職其年秋九月七日遇暴疾翌日終于郡之官舍
享年六十有一明年春二月歸葬江寧府某所禮也夫
人查氏吉王府長史昌之女也工部尚書文徽之妹婉
孃之德閨房之秀內助著美士林所推子七人長曰鈞

袁州新喻尉次曰錯樞密院承旨次曰鍾舉進士次曰
銓前國子監三禮次曰鐸鉞鑣皆國子監生女一人適
秘書省正字周希定君有孝悌之性聞于宗族敦然諾
之信稱于友朋守已有常事君不諂位未達而知足祿
雖優而彌貧其當官持事也必盡已所長不為利回不
為威惕故屢失大臣意然好直之士亦以此多之鉉多
塵近職熟君操行直筆聳善以告後人故銘其墓曰
英英趙君松茂蘭薰應用以法飾身以文道直詞正心

平氣純如何不淑今也為塵金陵仙鄉古多名人歸骨
于是與善為鄰泉臺不曉龍樹空春勒名挂劒慷慨沾

巾

騎省集卷十五